


Worfeiler  
Kerb 1998



Kerwespruch

## *Worfeller Kerwespruch 1998*

Jetzt isses wirrer so weit,  
in unserm scheene Ort iss Kerwezeit,  
die Kerweborsch sein veel geroannt,  
unn sinn uff eier Moinung sehr gespoannt.  
Donn däässjohr dess iss wohl wohr,  
do gibt´s e Kerb wie nie zuvor.  
Gefeiert werd jetzt in de Parregass,  
unn meer hoffe ehr hoabt all eiern Spass,  
net meh im Soal sondern im Zelt,  
do kennt ehr feiern wie´s eisch gefällt.

Zeltkerb bei uns, was e Gericht,  
vun e paa hoann mer se gehert die bleede Sprich,  
doch en Kerweborsch gibt net so schnell uff,  
die Zeltkerb die steht, was hoam mer geschufft  
En Gag geprobt, de Boam gestellt, dess muss jo soi,  
awwer ach de Rest iss do, wie Weck, Worscht unn Woi!  
Sogar unser Mädcher sein däässjohr debei,  
unn dunn uns helfe bei allerlei  
Doanke wolle mer eisch hier an dieser Stelle,  
ehr Kerwemädcher vum scheene Worfelle.

Ehr kennt mer´s glaawe ehr liewe Leit,  
so e Zeltkerb zu mache des iss net leicht  
Ach eh paa vun eisch hoann des glei gecheckt,  
unn hoann uns unnerstitz bei unserm Projekt  
Selbst die Ohwohner hoann gesoat: des kennt ehr ruisch  
mache,  
groad die hoann oann Kerb neemlich net veel zu Lache  
Es goanze Wocheenn loang den Zerkus in de Gass,  
denne isses egal, die feiern mit unn hoann Spass  
Doch oamm Enn sein mer all wirrer all froh,  
woans haaßt die: Worfeller Kerb iss do

Jetzt erzeel isch eisch, oh Moann oh Moann,  
woas Mädcher unn Kerl so getrewwe hoann

Nr.1

De Kai iss bei de Marine, dess iss jo bekoannt,  
unn dass er net hungert, hat em soi Moama eh Päckche  
gespoannt

Lauder gude Sache warn do drin zu finne,  
dass de Kerl net so oft oan de Kiosk muß renne

Eh Doos Brotworscht, e Daafel Schoggeload,  
e paa Sogge unn eh Duschgel fers Boad

Aa en Wegger damit der Kerl net verpennt,  
also iss die Rosel noch Badderie holle gerennt

Des goanze Gelumps noch schnell ins Paket enoi  
zugebunne, ab uff die Post unn nuff zum Kai

Erchendwo uff em Weeg hoats en Postbeoamte geblickt,  
in dem Paket iss woas drin, woas ferschderlich tickt

Der hoat sofort ess Bomberäumkommando alarmiert,  
dass em dess bleede Päckche net explodiert

Die soin gerennt unn hoann geschwitzt wie die Berserker,  
ess Päckche gefilzt, gefunne hoann se em Kai soin Wegger

Awwer Rosel mach der koan Kopp dess dut halt bassiern,  
wenn mer die Badderie noi dut, dass de Wegger funktionert

Drum singe mer jetz oans, mer hoffe dass ders gefällt,  
: Wer soll das bezahlen, wer hat das bestellt?

Nr.2

Um zwaa vun unserne greeßde Spezialiste im Ort,  
geht´s inn unserm nächste Raport

Thomas Vatter unn Stefan Körner haaße die zwaa,  
unn warn letzt uff Sauftour unn zwar goanz alloa

Al´s se genugk hadde, unn warn schunn goanz merb,  
wollte se noch mol ins Backhaus unn doann inn ehr Bett

Awwer koaner do der se fährt, so en Mist,  
also ruckzuck eh Taxi geruffe unn noi inn die Kist

Oah moal noach Worfelle unn dess vite, vite,  
isch will noch ins Backhaus, isch brauch noch eh Bit!

In Worfelle ohkumme steit de Vatter Bär aus,  
bezoahlt soi Taxi, geht Rischdung Backhaus

Der hadd gedenkt de Körner wär hinnerm,  
doch der sitzt noch im Taxi uff soim braade Hinnern

Völlisch entsetzt sterzt de Bär in die Kneip,  
schnappt sich oam Oigoang glei die erstbeste Leit

Ehr misst mer helfe, stammelt er schockiert,  
der Taxifahrer hodd de Körner entfiehrt

In jed Kneip im Ort isser geeilt,  
erzählt jedem die Story vum Körner soim Leid

Mer misse den suche, sunst wird der net alt,  
der Taxifahrer, der Sack, der macht den sunst kalt

Woas de Bär net wusst, de Körner foand´s net,  
der lag nämlich dehoam in soim warme Bett

Awwer Vatter Bär es iss schee dass du de Körner hoast  
vermisst,  
veer disch singe mer jetz extra  
: Unn als eh mol gesoffe, unn als eh mol gepisst!

Nr.3

Vier verrickte Worfeller uff em Kreuzfahrtschiff,  
do iss es fast vorprogrammiert, dass dess leeft uff eh Riff

Dess iss Gott soi Doank net bassiert,  
awwer woas oanners, woas eisch amüsiert

Die Aida, ess Clubschiff, dess iss bestimmt schee groß,  
unn schunn ging veer unser vier Worfeller die Reise los

Eh Karibikkreuzfahrt mit allem drum unn droh,  
dess macht doch koan Spass, wenn mer iss alloa

Do werd veel gefeiert, bis dess Schiff dut brumme,  
oann demm Ohwend hoann die vier oam lautste gesunge

Aida olé, du geiler Pott,  
isch haach mer glei noch en Rum inn de Kopp

Fer denn Oane wurd's Zeit des war de Vatter Bär,  
doch der wollt's net oiseje, soi Glas war net leer

Do kimmt en Matros unn seegt: auf mer geje,  
du besoffener Sack koanst jo kaum noch steje

Mit drei Moann hoann senn inn soi Bett geschleppt,  
als er drinn war, sogar noch zugedeckt

Doch de Vatter Bär kam wirrer unn guggt sisch um  
frisch um gezoue kreischt er: Ober enn Rum

Drei moal iss er wirrer uffgedaucht,  
en Matros hoat gesoat: Isch binnem glei enn Oangger um de  
Bauch

Isch hätt de Vatter Bär beim letzte Mohl gern mohl geseje,  
alser inn Schlips, Radlerhos unn Schlabbe uff de Aida dut steje

Lieber Vatter Bär weil doin Urlaub iss leider vorbei,  
singe mer fer disch alloa: Es gibt kein Bier auf Hawaii!

Nr.4

Oan Vermissde hoann mer schunn in unserm Spruch,  
awwer es kimmt noch oaner dezu, als werns net genuch

In Biddelborn bei de Houseband iss es gescheje,  
do hadd de Maik soi gross Lieb geseje

Hadd sisch glei oan die Fraa drohgemoacht,  
unn mit rer Ohwends noch veel gelacht

Uff oah mol warer wie vum Borrem verschluckt,  
die Worfeller soin all soamme gezuckt

Gesucht hoann se den Kerl in de Bisch unn de Hecke,  
doch vum Maik koa Spur uff weider Strecke

Vier Doach long warer vermisst,  
wo hie hadd sisch der Kerl nur verpisst

Es halwe Ort wurd scheggisch gemoacht,  
uff oah mol iss er bei unsre Hoandballer uffgedaucht

Himmelhochjauchzend sisch koaner Schuld bewußt,  
hadd soine Kumpels erzählt, vun soiner neje Liebeslust

Maik bass uff, verliebt vier Doach long fort,  
ruckzuck bisde verheiert unn in emm oannern Ort

Maik nun iss es bassiert Amors Pfeil hoat disch getroffe,  
Isch glaab du warst bei de Feierwehr goanz schie besoffe

Awwer Maik mer gönne es dir unn doiner Fraa,  
zum Polderohwend soin mer all wirrer do

Uff de Stroß der Liewe dust du Fahrn,  
desahlb singe mer veer disch : Ein weißer Schwan

Nr.5

Uff em Hoinerfest koan aach veel bassiern,  
woan die Deutsche Fußballer dunn verliern

Die WM iss futsch woas wurd geflennt,  
do soin eh paa Worfeller glei uff's Hoinerfest gerennt

Verlorn, egal unn hoch die Tasse  
mer loasse uns de Spass net vermasselte

E hart Schlucktour dess muss soi,  
dengge se sisch unn schlucke als noi

Vum Hoamelzelt noch in sämtliche Kneipe,  
dunn sisch bis Moijens ehr Zeit vertreiwe

Oam End steht oaner vorner Heck froacht bloß net wehr,  
wie koans oannersd soi, es war de Vatter Bär

Woankend steht der Kerl vor dem Busch,  
unn seegt noch so schie: Bass uff isch verbass der e Dusch

De Spatz schunn in de Hoand die Oannern greee enn Schreck,  
sagt der Watz Kopp üwwer in die Heck

Nur noch die Fieß gugge aus de Heck eraus,  
de Rest steht debei unn spend Applaus

Vatter du musst moh oann die oannern denke,  
die musste disch aach wirrer Hoam lenke

Oah Liedsche singe mer noch zu doine oannern Lieder  
unn dess iss jetz: Auf und nieder immer wieder

Nr.6

Unn noch en Worfeller hadd oam Hoinerfest oaner gerisse,  
isch glaab der hodd die Busfahrerei erst mol gefresse

Erst mol isser oann die Bushaldestell gerennt,  
doann hadd der Dabbess noch soi Station in Worfelle verpennt

Bis nohch Schneppehause musst er fahrn,  
denkt sisch wo bin isch hier, doch net dehoam

de goanze Weeg noach Worfelle zurick laafe,  
des koan oan im Suff schunn goanz schee schwer schaffe

Unnerwegs denkt er sisch: Moann wie weit iss des noch,  
Junge sei tapfer-Hoam musst de doch

In Worfelle oahkumme glei in die erst Kneip,  
Wert e Bier unn en Schnaps, du waast Bescheid

Moi Fies dun mer weh vunn dem lange Marsch, dut er  
schenne,  
Ei Heyd du waast doch: im Bus soll mer net penne

Ausserdem hält son Marsch de Körper fit,

unn macht disch schee dorschtsch fers nächste Bit!

Awwer Heyd, daß du net kriggst de Frust,  
singe mer fer disch: Das Wandern ist des Müllers Lust

Nr.7

E Haisje in de Palz, unn des verkaafe,  
do muss mer halt vorher e bissje woas schaffe

Em Arnd soin Vatter musst noch e mol in de Baumarkt,  
weil er zum Renoviern net alles dehoam hadd

Unnerwegs fällt em siedendhaas oi,  
daß er soi Portmonee net hadd debei

Glei noch e mol zurick zum Haus,  
springt wie e Gazell aus em Audo eraus

De Modor lässt er laafe die Hoandbrems offe,  
mer kennt groat moane der war besoffe

Besoffe war er net eher in großer Hast,  
ins Haus noi gerennt hadd soi Portmonee gefasst

Rennt wirrer raus unn kriggt en riese Schreck,  
verdammte Kacke-es Audo iss weg

Do kreischt er: Arnd kumm raus siehst du moi Kist“  
: No Vadder, seegter du musst wisse wo se iss

Ei gug doch mol de Hiehel nunner,  
do steht er doch der oale Brummer

Des Audo hadd sisch selbststännisch gemoacht,  
unn iss mit voller Wucht oan e Laddern droh gekracht

Die Karre war Schrott woas en Schoade,  
doa hoann se de Howwel uff em Schrottplatz oabgelade

Mit em Baumarkt war do nadierlich Schluß,  
em Arnd sein Vadder hadd en riese Frust

Awwer macht eisch net so e Herrn,  
fer eisch zwaa singe mer jetz: Die Gasladdern

Ehr liewe Leit oans koan isch eisch soache,  
vunn dem veele Schwätze verkroampft sisch moin Moache  
Moin Kehlkopp der iss aach schunn wund,  
de Gaver leeft mer wie em Hund  
Die Stimmbänner schohne dess muss soi,  
isch brauch erst moal en kiele Woi

Veel bleede Sache sein dääsjohr passiert,  
geschildert hoan ischs eisch, unscheniert  
Ehr Betroffene, isch hoff ehr seid mer net bes,  
ehr wisst isch erzähl alsemoal Kees  
Drotzdem muss isch eisch e gross Lob ausspreche,  
doan mit so gude Story's hoat koaner gerechent  
So Dinger find ehr in koam Buch,  
sondern nur im Worfeller Kerwespruch

Fer dääsjohr iss de Spruch jetz rum,  
Isch hoff das ehr heit Oawend all kummt  
Doan mer sein immer noch recht fit,  
loasst eisch net geh, feiert mit  
Im Festzelt losse mer noachher noch die Sau erraus,  
Oan de Musigg steht heit Ohwend de Klaus  
Mer hoffe ehr seid doan all do,  
Woans haast: Die Worfeller Kerb iss do